

# यहूदा क पत्र

ईसू मसीह क नउकर अउर याकूब क भाई यहूदा कइँती स तोहरे ओन बोलाए भएन क नाउँ,

जे परमेस्सर क पिता में प्रिय अउर ईसू मसीह क बरे सुरच्छित अहइ!

2तोहका दाया, सान्ति अउर पिरेम बहुतियात स मिलत रहइ।

## पापी क दण्ड मिली

3पिआरे दोस्तो! मईँ बहोत चाहत रहे कि तोहका उ उद्धार क बावत लिखउँ, जेकर हम सबे भागीदर अही। मईँ तोहका लिखइ क अउर प्रोत्साहित करइ क आवस्यकता क अनुभव किहेउँ जइसेन कि तू उ बिसवास बरे संघर्ष करत रहा जेका परमेस्सर पवित्तर मनइयन क हमेसा हमेसा बरे दिहे अहइ। 4काहेकि हमरे सबके बीचे में कछू मनई चोरी स आइ ग अहइँ। एनके अपराध क बावत सास्तर में पहिलेन स आगाह कइ दीन्ह गवा अहइ। इ सबइ परमेस्सर क विरोध में अहइँ। इ पचे परमेस्सर क अनुग्रह क लुच्चापन में बदल डावत हीं अहइ अउर हमार एक ही पभू अउर स्वामी ईसू मसीह में नाहीं बिसवास करतेन।

5मईँ तोहका इ याद दियावा चाहत हउँ कि जउन पभू अपने लोगन क मिस्त्र क धरती स बचाइ क निकार लिहे रहा। अउर जउ उ बिसवास नाहीं करत रहेन, ओनका कउने तरह स नस्ट कइ दिहे रहा। 6अउर याद राखा कि जउन सरगदूतन अपने पद क स्थिर नाहीं रख सकेन आपन अउर निज निवास क छोड़ दिहे रहेन, उ ओनका अनन्त बन्धनन में जकडिके उस भीषण दिन क निआव बरे अन्धकार में रखे बाटइ। 7इही तरह स मईँ तोहका इहउ याद दिआवा चाहत अहउँ कि सदोम अउर अमोरा अउर ओनके लगे पास क नगरन ऐनही दूतन क तरह यौन अनाचार किहेन तथा अप्राकृतिक यौन सम्बन्ध क पाछे धावत रहेन। ओनका कबहूँ न बुझइवाली आगी में झोक देइ क दण्ड दीन्ह गवा। हम सबन क अइसे उदाहरण स सीख लेइ चाही।

8ठीक इही तरह हमरे समहूँ में घुसइवाले इ सब मनई अपने सपना क पीछे दउइत अपने सरीर क असुद्ध करत अहइँ। इ सबइ पभू क तुच्छ जानत हीं अउर महिमावान सरगदूतन क निन्दा करत हीं।

9प्रमुख सरगदूत मीकाईल जउ सइतान क साथ विवाद करत भवा मूसा क लहास क बावत बहस करत रहा तउ उ ओकरे खिलाफ अपमानजनक आरोप लगावइ क हिम्मत नाहीं जुटाइ सका। उ सिरिफ एतना कहेस, “पभू तोहका डाटइ अउर फटकारइ।” 10मुला इ लोग तउ ओन बातन क निन्दा करत हीं अउर इ पचे ओनका नाहीं समझतेन। अउर

इ पचे अविवेकी जानवरन क नाई जउन जिन बातन स सहज रूप स परिचित अहइँ, इ बातन उहइ बाटिन ओनही क द्वारा नास होइ जात ह। 11ओनके सबके बरे इ बहुत खराब अहइ, काहेकि उ पचे कैन क रास्ता चुनेन्ह। धन कमाय बरे उ पचे खुद क वइसेन गालती क हवाले कइ दिहेन जइसेन बिलाम किहे रहा। इ बरे ओनही क नास होई जइसेन कोरह क विद्रोह में भाग लेइवालेन मर-बिला ग रहेन।

12इ पचे तोहरे प्रीतिभोजन में छिपी समुद्र तल की चट्टानन क तरह अहइँ जउन कि घातक अहइँ। इ पचे बिना डरे तोहरे साथे खात हीं, पिअत हीं मुला ओनका अपने स्वार्थ क फिकिर रहत ह। उ बिना पानी क बादर अही। उ पचे पतझड़ क अइसेन पेड़ अहिन जउने प फल नाहीं होत। उ दुइ दाई मरा अहइ। ओनका उखाड़ा जाइ चुका अहइ। 13उ पचे समुद्र क अइसी भयानक लहर अहइँ, जउन अपने लज्जाजनक करमन क ज्ञाग उगलत रहत हीं। उ सब इधर उधर भटकत अइसे तारा अहइँ जेनके बरे अनन्त घनघोर अंधेर सुनिश्चित कइ दीन्ह ग अहइ।

14आदम स सातवी पीढ़ी क हनोक भी एनके बावत अइसेन सब्दन में भविस्सबाणी किहे रहा, “देखा, उ पभू अपने हजारन हजार पवित्तर सरगदूतन क साथ 15पभू हर मनई क निआव करी। उ सब मनइयन क परखइ आवत अहइ अउर जउन ओकरे खिलाफ अहइँ ओन सबनक दण्ड देई। परमेस्सर एन सब मनइयन क सजा देइ जउन बरा करम किहे बाटेन। उ इ सबइ पापी लोगन क सजा देइ जउन परमेस्सर क खिलाफ रहेन। उ ओन बुरी बातन बरे सजा देई जउन परमेस्सर क खिलाफ किहे बाटेन।”

16इ पचे चुगुलखोर अहीं अउर दोख दूढइवाले अहीं। इ सबेन्ह अपनी इच्छा क गुलाम अही अउर अपने मुँहे स घमंडभरी बात बोलत हीं। अपने फायदे क बरे इ सबेन्ह दूसरे क चापलूसी करत हीं।

## जतन करत रहइ बरे चेतावनी

17मुला पिआरे दोस्तो, ओन सब्दन क याद करा जउन हमार पभू ईसू मसीह क प्रेरितन पहिलेन कहि चुका अहइँ। 18उ पचे तोहसे कहत रहेन, “आखिरी समइ में अइसे मनई रइहीं जउन परमेस्सर स जुड़ी बातन क मजाक उडइहीं।” उ पचे गन्दी इच्छा क पाछे पाछे चलिहइँ। 19इ पचे ओनही अहीं जउन फूट डावत हीं। इ सबइ संसारिक अउर आतिमा रहित अहइँ।

20मुला पिआरे दोस्तो, तू पचे एक दूसरे क बिसवास स आध्यात्मिक रूप स आपन क पवित्तर बिस्सास में मजबूत

करत रहा। पवित्र आत्मा क साथ पराथना करा। 21अपने आप क परमेस्सर क पिये मँ बनाए रखो अउर अनन्त जीवन बरे उत्सुकता स हमरे पभू ईसू मसीह की द्या क बाट जोहत रहा।

22जे संदेह करत हय, ओनके ऊपर द्या करा। 23दूसर मनइयन क आगे बढ़िके आग स निकार ल्या। अउर दूसर मनइयन क बचावा। मुला दया देखावत सावधान रहया लेकिन ओनके कपन तलक स नफरत कर्या जउने प ओनके सांसारिक तरह स जीवन यापन पइ पाप क धब्बा लगा अहइ।

### परमेस्सर क स्तुति

24उ (परमेस्सर) मजबूत अहइ अउर तू सबन क ठोकर खाइ स बचाइ सकत ह। अउर अपनी महिमा क उपस्थिती मँ तू पचन क निर्दोस अउर आनन्दित कइके खड़ा कइ सकत ह। 25उ एकइ परमेस्सर बा। उ सिरिफ एक अहइ जउन उद्धार कइ सकत ह। हमरे पभू ईसू मसीह क द्वारा हमरे उद्धार करइवाले एकही परमेस्सर क महिमा, वैभव, पराक्रम अउर अधिकार हमेसा हमेसा स अब तलक भूतकाल मँ, अब अउर भविष्य मँ अउर जुग जुग तक बना रहइ। आमीन।